

## साधारणीकरण-परिभाषा ते साहित्य च उसदी भूमिका

□ डॉ० सत्यपाल श्रीवत्स\*

भारती काव्य शास्त्रिये साधारणीकरण दा साहित्य बिच ते खास करिये नाट्य साहित्य बिच बड़ा टकोहदा ते अहम् थाहर मन्ने दा ऐ। साहित्य दे द्वारा साधारणीकरण दी स्थिति पैदा कीते बगैर नां गै साहित्यकार जां कवि नां गै नाटककार ते नां गै पाठक, स्रोता जां दर्शक पूर्णनन्द प्राप्त करी सकदे न। इस लेई कुसै बी उत्तम साहित्यक रचना च साधारणीकरण दी बड़ी अहम भूमिका होंदी ऐ।

साधारणीकरण दी स्थिति च पुज्जिये माहनू दी आत्मा जेहड़े नन्द दा अनुभव करदी ऐ ओह व्यक्ति दी सीमा कोला उप्पर उट्टिये समशिट दे दायरे च जाई पुजदी ऐ। कवि, नाटककार जां उपन्यासकार अपनी रचनें बिच जिनें-जिनें रसें गी तुआरदा ऐ ओह छड़े उसै गी नन्द देने दे साधन नेई बनदे न बल्के पाठकें दे निरन्तर नन्द दा कारण बी बनी जंदे न। इयै साहित्य गी साधारणीकरण दी अति म्हत्तव आहली देन ऐ।

असल च साधारणीकरण दा मतलब ऐ आलम्बन दा बजूद बनाई रखदे होए बी उसी इयां पेश करना जे ओह अपने-पराये दे भेद-भाव कोला उप्पर होई जाऽ ते सारे सहिरदे पाठकें, दर्शकें ते स्रोतें दी भावनें दा समान रूप कनै विशे बनी सकै।

साहित्यकार दी मौलक अनुभूति साधारणीकरण दे माध्यम कनै गै व्यापक ते बहुआयामी बनदी ऐ। असल च साहित्यकार दी अनुभूति इक विज्ञानक दी अनुभूति आहला लेखा होंदी ऐ। इक विज्ञानक जिनें चीजें दा अविशकार करिये जिनें धुवें गी निश्चत करदा ऐ जां आविश्कृत चीजें दे बारे

च जिनें नियमें गी घड़दा ऐ ओह देश, काल ते व्यक्ति दिये सीमें कोला बाहर होंदे न। जिसलै साहित्यकार ते पाठक जां नाटककार दे पात्तर ते दर्शकें दे दरम्याम अपने, पराये दी भावना गै मिटी जंदी ऐ तां गै साधारणीकरण दी स्थिति औंदी ऐ।

साधारणीकरण दे बारे च विद्वानें दे केई मत न। भाएं सारे मत अप्पू-बिचचें तकरीवन मिलदे-जुलदे गै न पर तां बी उंदी तर्जेव्यानी जां व्याख्या पद्धति बक्खरी-बक्खरी ऐ।

कश्मीर दे प्रसिद्ध बहुमुखी प्रतिभा दे विद्वान आचार्य अभिनव दे मताबक साधारणीकरण दी परिभाषा इस चाल्ली ऐ :-

1. शब्द दी अभिधाशक्ति द्वारा काव्य जां नाटक दे अर्थ दा सिर्फ ग्यान होंदा ऐ। उसदे च साढ़े हिरदें गी भाव-विभोर करने दा चमत्कार नां मात्तर गै होंदा ऐ, पर शब्द दी व्यंजना शक्ति दे हरकत-बपार कनै आलंबन विभाव ते उद्दीपन विभाव कनै साधारणीकरण दी स्थिति पैदा होई जंदी ऐ। साधारणीकरण दी स्थिति गी उजागर करने आस्तै अनुभाव ते व्यभिचारी भाव दा म्हत्तव आहला योग दान होंदा ऐ। ओह आखदे न जिसलै साहित्यकार दी रचना दी विषय वस्तु कनै पाठकें दे हिरदे दा तादात्म्य सरबन्ध स्थापत होई जंदा तां उसलै साधारणीकरण स्थिति औंदी ऐ।

उंदे अभिव्यक्तिवाद सिद्धान्त दे मताबक-जिसलै कुसै रचना गी पढ़िये पाठक ते कुसै नाटक गी दिक्खिये दर्शक अद्वैतभाव गी प्राप्त होइये आत्मविस्मृत होई जंदा ऐ तां उसी असीम नंद प्राप्त होंदा ऐ। इयै साधारणीकरण दी स्थिति ऐ। उसलै राम, कृष्ण, रावण कंस, उद्यन, दशरथ, कौशल्या, सीता, देवकी, वासुदेव, प्रेमचन्द दे गोदान दा होरी ते गोबर, कास्तू दा काला तित्तर कहानी दी कास्तू, अछूत नाटक दी भिक्खू चमैरी बगैरा भिन्न-भिन्न रचनें दे पात्तर उनें रचनें गी पढ़ने आहले पात्तरें दे आलम्बन बनी जंदे न। असल च व्यंजना शक्ति दे संचार दे बपार कनै गै अनुभवें दा साधारणीकरण होंदा ऐ।

काव्य जां नाटक दे पात्तरें दे परम नन्दें दी अनुभूति जिसलै दर्शकें ते पाठकें गी बी उसै चाल्ली होन लगदी ऐ तां साधारणीकरण दी स्थिति बनी जंदी ऐ। उसलै बेशक ओह (दर्शक ते पाठक) जानदे बी न जे पात्तर जां

\* 47/5 रूप नगर जम्मू

नट असल च असली राम, कृष्ण, सीता ते राधा बगैरा नेई न, पर तां बी उंदा उंदियें हरकतें कन्नै इन्ना तादात्म्य सरबन्ध होई जंदा ऐ जे ओह इक अजीब जनेही आत्म विस्मृति भरोची नंदै दी स्थिति च पुज्जी जंदे न। बस इ'थै साधारणीकरण दी स्थिति होंदी ऐ।

पात्तरें द्वारा अभिनीत दुख, शोक ते गम आहले अभिनय थमां दर्शक जां पाठकें गी उ'ऐ नेहा नंद औंदा ऐ जनेहा शृंगार ते हास बगैरा आहले अभिनय थमां होंदा ऐ। एह नोखा नंद गै साधारणीकरण दी स्थिति दा नतीजा ऐ। सत्यवादी हरिश्चन्द्र नाटक च रोहित दी मृत्यु दे बाद जिसलै उसदी मां शैव्या उसदा शव लेइयै मसानघाट पुजदी ऐ तां उत्थें अपने पति हरिश्चन्द्र गी गै ड्यूटी उप्पर तैनात दिक्खियै ते उसदे द्वारा कर (टैक्स) मंगने पर ओह जिसलै त्रेहरा रोन (पुत्तर-मृत्यु दा वियोग, राजा पति दी मसान घाट पर ड्यूटी ते पैसे दे अभाव करी टैक्स अदा नेई करी सकने दी असमर्थ दा) रोंदी ऐ। उसलै पाठक जां दर्शक अपने अत्थरूं नेई रोकी सकदे न। इयां गै रावण द्वारा सीता-अपहरण दा दक्ख, बावा जित्तो द्वारा ते बुआ भागां द्वारा कटारी घाइयै अपना-अपना बलिदान करने दे दक्ख ते न्यां करने आहले दाता रणपत दा कतल बगैरा जनेह दक्ख ते प्रसंग बी नेह दिल लहाने आहले न जे उनें गी दिक्खियै, जां पढियै दर्शकें जां पाठकें दियें अक्खीं चा आप मुहारे अत्थरूं निकलन लगी पौंदे न। असल च संक्षिप्त रूप कन्नै अस आक्खी सकनेआं जे साधारणीकरण दा मतलब ऐ आलम्बन दा बजूद बनाई रखदे होए बी उसी उआं पेश करना जे ओह अपने-पराये दा भेद-भाव कोला छुड़की जाऽ ते सारे सहिरदे पाठकें, दर्शकें ते श्रोतें दी भावनें दा समान रूप कन्नै विषय बनी सकै।

असल च दिक्खेआ जा तां कहानी, उपन्यास, काव्य ते नाटक दे पात्तर ते आमतौर पर काल्पनिक (स्वाए रामायण ते महाभारत दे) गै होंदे न पर रचनाकार उन्दे सुख-दुख ते बाकी हरकतें गी हस चाल्ली पेश करदा ऐ जे ओह पाठकें गी ते नाटक दा मंचन होऐ तां दर्शकें गी ओह सब अपनियां सेही होन लगदियां न। इस्सै लेई अस (पाठक-दर्शक) उंदै कन्नै तादात्म्य सरबन्ध स्थापत करी लैने आं ते जिसलै उंदा रसास्वादन करन लगी पौनें तां उसलै साढी अनुभूतियें दी जेहूडी स्थिति होंदी ऐ उ'थै साधारणीकरण दी स्थिति होंदी ऐ।

स'ब्बै काव्य शास्त्री आखदे न जे स्थायी भावें दी अवस्था च पाठकें ते दर्शकें दे हिरदें च रौहने आहले रस जिसलै आलम्बन-भावें कन्नै जागदे न ते उद्दीपन भावें कन्नै जागियै अनुभाव ते संचारी भावें कन्नै भलेआं आस्वादन (सुआद) दी स्थिति च पुज्जी जंदे न तां उसलै दर्शकें ते पात्तरें (पाठकें ते पात्तरें) दा अप्पू बिचें जेहूडा अद्वैत सरबन्ध स्थापत होई जंदा ऐ उ'थै साधारणीकरण दी स्थिति होंदी ऐ। पर इत्थें एह तत्थ स्पष्ट करी देना जरूरी ऐ जे साधारणीकरण दी स्थिति जां अवस्था दी अनुभूति दा रसास्वादन सिर्फ स-हिरदेवान् पाठक जां दर्शक गै करी सकदे, नां के दूए लोग। उंदे बारे च ते काव्य शास्त्रियें इयां आखे दा ऐ-“निर्वासनानां तु रंगान्ते काष्ठ कुड्यानि सन्निभः” अर्थात् निर्वासना आहले (जिंदे दिल खुश्क ते कठोर न) ते सभागार, हाल जां नाटकी मंडुए दे सामनें मदान च बैठे दे उत्थें रक्खी दियें लक्कड़ी दियें कुर्सियें ते दर्शक-दीर्घा आहला लेखा गै अनुभूति शून्य होंदे न। साहित्यकार दी मौलक अनुभूति साधारणीकरण दे माध्यम कन्नै गै व्यापक ते बहुआयामी बनदी ऐ। असल च साहित्यकार दी अनुभूति इक विज्ञानक दी अनुभूति आहला लेखा होंदी ऐ। विज्ञानक जिनें चीजें दा अविष्कार करियै जिनें ध्रुवें गी निश्चत करदा ऐ जां आविष्कृत चीजें दे बारे च जिनें नियमें गी घडदा ऐ ओह देश काल ते व्यक्ति दियें सीमें कोला उप्पर होंदे न। जिसलै साहित्यकार ते पाठक जां नाटककार दे पात्तरें ते दर्शकें दे दरम्यान अपने-पराये दी भावना गै मिटी जंदी ऐ तां गै साधारणीकरण दी स्थिति औंदी ऐ।

साधारणीकरण दे बारे च भट्ट नारायण आखदे न जिसलै साहित्य जां नाटक दा रसास्वादन होन लगदा ऐ तां झट इक नेही स्थिति आई जंदी ऐ जिसलै साधारणीकरण होई जंदा ऐ। साहित्य दर्पणकार विश्वनाथ होर आलम्बन, उद्दीपन, स्थायीभाव ते पाठक इनें सारें दा साधारणीकरण मनदे न। ओह आखदे न जे इनें स'ब्बनी दे पारस्परक घने सरबन्ध गै साधारणीकरण दी स्थिति पैदा करने च मददगार साबत होंदे न। डाक्टर श्यामसुन्दर दास हुन्दा आखना ऐ जे कवि जां साहित्यकार गी अपनियें रचनें कोला इक नोखी अनुभूति प्राप्त होने कन्नै जेहूडा नंद मिलदा ऐ उ'ऐ नेहा नंद जिसलै ओह रचना पढ़ने कन्नै पाठकें गी (नाटक होऐ तां दिक्खने कन्नै) बी प्राप्त होंदा ऐ तां उऐ साधारणीकरण दी अवस्था होंदी ऐ। अपनी रचना 'साहित्यालोचन' च ओह आखदे न जे

‘साधारणीकरण’ कवि, भावुक पाठक ते श्रोता जां दर्शक दी चिंतवृत्ति कन्नै सरबन्ध रखदा ऐ।” जेकर पाठक जां दर्शक भावुक नेई होन तां साधारणीकरण दी स्थिति पैदा गै नेई होई सकदी।

असल च कवि दे कवित्व दा असर ते चमत्कार साढ़े तोड़ी उसदी रचना दे माध्यम कन्नै गै पुजदा ऐ ते उस्सी पढ़दे मौकें साढ़े हिरदे दियां भाव-तरंगां उस रचना ते उसदे पातरें जां विशे-वस्तु कन्नै इयां जुड़ी जंदियां न जे उसलै अपने-पराये दा भेद गै मिटी जंदा ऐ। दुएं लफ्जें च साढ़ा रचना कन्नै बड़ा गैहरा संवेदनशील तादात्म्य सरबन्ध स्थापित होई जंदा ऐ। इस सम्बन्ध दा परिणाम गै साधारणीकरण होंदा ऐ। असल च साधारणीकरण अनेकता च एकता दी स्थापना करने लेई बड़ी म्हत्तव आहली भूमका नभांदा ऐ।

आचार्य रामचन्द्र शुक्ल दा आखना ऐ जे पाठक जां श्रोता जां दर्शक दे मनै च जेहड़ी खास विशे वस्तु अपना अक्स छोड़दी ऐ ओह जनेह काव्य च वर्णत कीते गेदे ‘आश्रय’ दे भाव दा आलम्बन होंदी ऐ उआं गै स’ब्बनी सहिरदे पाठकें जां श्रोतें दे भाव दा बी आलम्बन बनी जंदी ऐ। एह गै साधारणीकरण दी स्थिति होंदी ऐ। बाबू गुलाबराय आखदे न जे कोई रचना सिर्फ किश समान कर्म दी प्रतिष्ठा दे कारण गै नेई बल्के उस रचना च चित्रत पूर्ण व्यक्तित्व दी प्रतिष्ठा दे कारण गै सहिरदे पाठकें दा अलम्बन बनियै जिसलै उंदे रसास्वादन दा कारण बनदी ऐ तां उसलै साधारणीकरण दी स्थिति पैदा होंदी ऐ। व्यक्तित्व गी भुलाइयै सिर्फ उसदे गुणें कन्नै साधारणीकरण दी स्थिति कदैं बी नेई आई सकदी।

उप्पर किती दी चर्चा कोला एह साफ होई जंदा ऐ जे साधारणीकरण दा प्रतिपादन करने आहले काव्य शास्त्रियें इस तत्थ गी मनने दा ऐ जे श्रोता, पाठक, दर्शक ते आश्रय अर्थात् साहित्य च चित्रत पातरें दे दरम्यान जिसलै इक तादात्म्य सरबन्ध स्थापत होई जंदा ऐ तां साधारणीकरण दी स्थिति आई जंदी ऐ। इससै गल्ला गी अस इयां स्पष्ट करी सकने आं जे जिसलै साहित्यकार ते पाठक जां नाटक दे पातरें ते दर्शकें दे दरम्यान अपने-पराये दी भावना समाप्त होई जंदी ऐ तां उसलै साधारणीकरण दी स्थिति आई जंदी ऐ। साधारण शब्दें च इयै तादात्म्य दी स्थिति होंदी ऐ जिस कन्नै पाठक, दर्शक ते पातर इक असीम नंद दी स्थिति च पुज्जी जंदे न। इयै साधारणीकरण दी स्थिति मन्नी जंदी ऐ। इस स्थिति कन्नै गै अनेकता

च एकता दी स्थापना होई जंदी ऐ। विभाव, अनुभाव बगैरा जिसलै खास सरबन्धें कोला अगें निकली जंदे न तां ओह सहिरदें दी भावना दे साधारण रूप कन्नै बिशे बनी जंदे न। कवि ते कविता दा बिशे ते पाठक जिसलै भावना दे इक सूतर च बज्जी जंदे न उसलै साधारणीकरण होई जंदा ऐ। जेकर अस साहित्य बिच्चा साधारणीकरण दी मजूदगी गी नकारी देचै तां अस मुंशी प्रेमचन्द दे गोदान दे होरी, डोगरी दे कहानीकार स्व. नरेन्द्र खजूरिया दी कहानी दी नायिका ‘कातसू दा काला तित्तर’ दी नायिका कातसू ते ओम गोस्वामी दी कहानी कींगरे आहला चन्न दे पन्तू आस्तै कियां अत्थरूं बगाई सकने आं ते स्व० दीनू भाई पन्त दे प्रसिद्ध नाटक सरपंच दे खलनायक बांगी पर रोह करियै कियां मरीरियां बट्टी सकनेआं ते सरपंच रणपत दा न्यांS दिक्खियै कियां बाह-बाह करी सकनेआं ते उसदी हत्या उप्पर कियां अत्थरूं बगाई सकनेआं ते इयां गै कवि मधुकर दी ‘डोली’ कविता दे इयै नेह बन्द-

कु’न जाने में गोली बनना

कु’न जाने में रानी।

खबरै कियां-कियां लिखी ऐ,

उस विधना ने कहानी

xxxx

पलै च डुबदा, पलै च तरदा,

ए मन गोते खंदा।

कैसा अज्ञब बनाया लोको

भाग धियें दा मंदा?

पढ़ियै साढ़ियां हमदर्दियां उस कुड़ी कन्नै जुड़ी जंदियां न जेहड़ी सौहरे जाने आहलियें सारियें कुड़ियें दा प्रतीक बनी जंदी ऐ ते जिस्सी कवि दी कल्पना अपनी ‘डोली’ कविता दा केन्द्र बिन्दु बनाई दी ऐ। कविता दियां एह पंक्तियां पढ़दे मौकें इयां सेही होंदा ऐ जे मनो साढ़ी अपना गै धी-भैन सौहरे जा करदी ऐ ते उसदा रोना बशूरे ते करलद साढ़े कन्नै च सनोचा करदे न। इयां गै इस संदर्भ च डोगरी गजल दे बादशाह वेदपाल दीप दियें गजलें दे एह बंद बी बचारने जाग न-

बैठे दे नवज थ'म्मियै दिंदे दवा निं कक्ख,  
कसररी समाज भुक्खड़ा पूंजीपति हकीम।

× × × × × × ×

मिलने दी व्याकलता मनुक्खता च ऐ इन्नी,  
खिंडे दा जियां इक्क गै परवार आं अस लोक।

साधारणीकरण दी स्थिति च पुज्जियै पाठकें, श्रोतें ते दर्शकें दा हिरदा कवि,  
नाटककार ते लोक हिरदे कन्नै स्पन्दन करन लगी पौंदा ऐ। सरल शब्दें च अस  
साधारणीकरण गी सांझापन बी आक्खी सकनेआं। भावें दा साधारणीकरण होई जाने दे  
परेंत लौकिक अनुभवं दी स्थूलता, कौड़ापन, बगैरा दोश अपने आप मिटी जंदे न।

उपन्यास, कहानी नाटक बगैरा दे काल्पनक ते मौलक पातर अपने-अपने  
वर्ग दे प्रतिनिधि होने करियै साधारणीकरण दी स्थिति पैदा करने आस्तै बड़े  
मददगार साबत होंदे न। मुंशी प्रेमचन्द दे उपन्यास दे होरी, गोबर ते धनिया,  
रंगभूमि दा सूरदास, कालिदास दे 'मेघदूत' दा यक्ष, शकुन्तला नाटक दी शकुन्तला  
मोहन राकेश दे नाटक "आषाढ़ का एक दिन" दी नायका मल्लिका, स्व०  
भगवत् प्रसाद साठे दी डोगरी कहानी मंगते दा घराट' दा मंगता, डॉ० चम्पा  
शर्मा दी कहानी 'जातर' दी- नायिका लछमी ते उसदी सस्स धनदेई, पंजाबी दे  
उपन्यासकार नानक सिंह दे उपन्यास 'इक म्यान दो तलवारां' दा नायक करतार  
सिंह सराबा, विश्वनाथ खजूरिया दे नाटक अछूत दी भिक्खू चमैरी, शेक्सपियर  
दे नाटक टैम्पेस्ट दे पातर प्रासपैरो ते मिरांडा बगैरा पातर साढ़ी साधारणीकरण  
दी स्थिति गी उजागर करने आस्तै चंगी जमीन त्यार करदे न।

साधारणीकरण दी साहित्य च उपयोगता जां भूमका : कुसै बी उच्च  
कोटि दे साहित्य च साधारणीकरण दी बड़ी गै अहम् भूमका होंदी ऐ जेहड़ी कदें  
बी नकारी नेई जाई सकदी। इसदे बगैर कोई बी साहित्यक रचना टिकाऊ जां चिर  
स्थायै नेई बनी सकदी ते नां गै उसदे च साहित्यक चमत्कार गै आई सकदा ऐ।  
साधारणीकरण दी मेहरबानी कन्नै गै साढ़े मानसक भाव साफ-सुथरे ते धुले-धलादे  
होइयै साहित्यक पातरें कन्नै ताल-मेल जां सरबंध स्थापत करने दे काबल होंदे  
न। इस कन्नै उस्सी बड़ी नोखी आत्मानन्द दी अनुभूति होंदी ऐ। ते कन्नै गै उसदे  
प्रेम दा मानसक सार सात्विक होई जंदा ऐ। ते इस कन्नै ओह संकीर्णते ते कुंठें

कोला उप्पर उट्टियै विश्वबंधुत्व दी स्थिति तक जाई पुजदा ऐ जिस कन्नै उसदा  
सारा द्रिष्टिकोण गै बदली जंदा ऐ ते कन्नै मता बसीह बी होई जंदा ऐ। इससै  
लेई सहिरदे पाठक कालिदास, शेक्सपियर प्रेमचन्द, रवीन्द्रनाथ टैगोर, टालस्टाय,  
मैक्सिम गोर्की, डॉ० इकबाल ते बर्नार्ड शाह बगैरा संसार-प्रसिद्ध कवियें ते  
साहित्यकारें दे साहित्य गी पढ़ियै इक्कै नेहा नंद लैंदे न।

### पश्चमी द्रिष्टिकोण :

आई. ए. रिचर्डसन ते ए. ई. मेण्डर दे मताबक साधारणीकरण साहित्य दी  
ओह स्थिति जां अवस्था ऐ जिसदी ब'जा कन्नै पाठक जां दर्शक दी मानसक हालत  
थोढ़े चिरै लेई अपनी व्यक्तिगत आत्म चेतना जां पन्छन गी भुल्लियै नाटक, उपन्यास,  
सिनमा बगैरा कुसै दे बी मते संवेदनशील पातर कन्नै तादात्म्य सरबंध जोड़ी लैंदी  
ऐ। क्रोचे होर ते कवि दे दो व्यक्तित्व मनदे न-इक लौकिक ते दूआ आदर्श मूलक।  
लौकिक व्यक्तित्व च कवि ते पाठक दा अप्पूं-बिच्चें तादात्म्य सरबन्ध स्थापत होई  
जंदा ऐ। तादात्म्य दी इ'यै अवस्था साधारणीकरण खुआंदी ऐ।

खीर च अस इस बारे च इस नतीजे पर पुज्जेनां जे साधारणीकरण खास  
कुसै व्यक्ति दा नेई होइयै उसदे सरबंधें दा होंदा ऐ। ऐसी अवस्था च उसदे च  
नां गै अपनेपन दे कारण दुख-कष्ट ते नां गै परायेपन दे कारण ईर्ष्या बगैरा आस्तै  
कोई थाहर रौहदा ऐ। उसलै कवि, उसदी रचना ते उसदे पातर बी व्यक्तित्व दी  
सीमा कोला उप्पर उट्टियै साधारणीकरण कोल असाधारण होई जंदे न। दुऐ पासै  
पाठक, श्रोता ते दर्शक बी अपने व्यक्तित्व दी तंग हद कोला उप्पर उट्टियै लोक-  
समानता दी विशाल भाव-भूमि च आई पुजदे न। की जे निजी व्यक्तित्व दे कन्नै  
गै बञ्ची रौहना रसानुभूति च बाधक बनदा ऐ। इस बास्तै साधारणीकरण दी अवस्था  
दे बास्तै इनें बंधन कोला मुक्त होना गै जरूरी ऐ। साधारणीकरण दी स्थिति च  
पाठक, श्रोता ते दर्शकें दे हिरदे कवि ते लोक-हिरदे कन्नै प्रतिस्पन्दन करन लगदे  
न। भावें दा साधारणीकरण होई जाने दे परेंत लौकिक अनुभवं दी स्थूलता, तीक्ष्णता  
ते कटुता बगैरा दोश नष्ट होई जंदे न। उपन्यास कहानी, नाटक ते महाकाव्य बगैरा  
दे पातर काल्पनक होने पर बी साधारणीकरण च कोई रुकावट नेई आंदी की जे  
ओह पातर अपने-अपने वर्ग दे प्रतिनिधि होंदे न।